

## Y Sbectol Hud

*(addasiad o 'Gyngor ar Bwysigrwydd Dychymyg' – ar gyfer yr Gŵyl Pontyberem)*

Pan fydd yr haul yn cwato'r<sup>1</sup> sêr i gyd  
A'r nos ar goll tu ôl i ddrws y dydd,  
Pan fydd y lleuad wen ymhen draw'r byd  
A'r machlud fel y wawr ar orwel cudd;

Neu, pan fydd niwl yn gwisgo'r bryniau draw,  
A phlu yr eira'n oeri brigau'r llwyn,  
Pan fydd y blodau trist yn crio'r glaw-  
Rho bâr o sbecs dychymyg ar dy drwyn.

Ti'n gweld, mae gweld yn anodd ambell waith  
A ninnau'n ddall i ryfeddodau'r byd,  
Mae'n anodd gweld y wên trwy'r gwgu maith,  
Mae'n anodd gweld y glas trwy'r glaw i gyd.

Am hyn fy ffrind, cyn dechrau ar dy daith,  
Ym mhoced ôl dy jîns rho'r sbectol hud,  
A gwisga hi, a mentra godi'r llen  
I weld holl liwiau'r enfys sy'n dy ben.

mh

---

<sup>1</sup> Gan fod 'cwato' yn air tafodieithol iawn, awgrymaf fod croeso i unrhyw un newid y llinell hon i:

Pan fydd yr haul yn **cuddio'r** sêr i gyd